

## **Statuto de Konversacia Esperanto-Klubo**

### **§1. Nomo kaj celo**

- 1.1 La nomo de la societo estas “Konversacia Esperantista Klubo” (Københavns Esperanto-Klub – KEK), fondita la 2-an de januaro 1908.
- 1.2 La celo de la societo estas, kiel loka sekcio de Dana Esperanto-Asocio, progresigi la konatecon kaj la aplikadon de Esperanto en la regiono de Kopenhago, unuavice per certigo de regula instruado de la lingvo.
- 1.3 La societo kiel tia estas neŭtrala koncerne naciecon, rason, religion kaj politikon.
- 1.4 La laboro de la societo laŭeble okazu kiel integra parto de la loka kultura vivo kaj kunlabore kun aliaj similcelaj societoj.

### **§2. Lingvouzo**

- 2.1 La societo devas regule okazigi kunvenojn kie Esperanto estas uzata. La estrarkunsidoj de la societo kaj traktadoj kun aliaj Esperanto-societoj okazas preferinde en Esperanto. La Ĝenerala Kunveno laŭ deziro de la plimulto de la ĉeestantoj povas okazi en la dana lingvo.
- 2.2 La decidoj de la estraro kaj de la Ĝenerala Kunveno estas protokolataj en Esperanto. La protokolo de la Ĝenerala Kunveno kaj la statuto de la societo devas troviĝi en danlingva traduko.

### **§3. Membreco**

- 3.1 Membro de la societo povas fariĝi ĉiu persono, kiu interesiĝas pri la laboro de la societo kaj agnoskas ĝian statuton.
- 3.2 Honoraj membroj estas nomumebaj de la Ĝenerala Kunveno laŭ rekomendo de la estraro.
- 3.3 Jarkotizon fiksas la Ĝenerala Kunveno.
- 3.4 Voĉdonrajton en la Ĝenerala Kunveno havas ĉiu membro, kiu pagis kotizon minimume 1 monaton antaŭe.
- 3.5 Membro, kiu post du pagpostuloj ne pagis kotizon dum 4 monatoj, estas rigardata kiel ekŝiĝinta el la societo.
- 3.6 La estraro povas, skribe kaj kun necesa motivo, eksigi membron kiu evidente kontraŭlaboras la celojn de la societo. Eksigita membro havas la rajton plendi pri la decido al la Ĝenerala Kunveno.

### **§4. Estraro**

- 4.1 La societon gvidas estraro, kiu konsistas el prezidanto kaj minimume 3 pliaj membroj, kaj kiu dividas inter si la oficojn de vicprezidanto, kasisto kaj sekretario. Okaze de voĉ-egaleco, decida estas la voĉo de la prezidanto.
- 4.2 La membroj de la estraro estas elektataj de la Ĝenerala Kunveno kaj estas reelekteblaj. La prezidanto, aparte elektata, funkcias dum 1 jaro, la ceteraj estraranoj dum 2 jaroj, tiel ke ĉiujare duono el ili estas elektataj.
- 4.3 Ĉe la elekto de estraranoj estas samtempe elektataj minimume 2 anstataŭantoj, kiuj funkcias dum 1 jaro.
- 4.4 La kasisto ellaboras la kalkulaĵon. La administra jaro estas la kalendara jaro.
- 4.5 La kalkulaĵon de la societo revizias 1 revizoro, elektata de la Ĝenerala Kunveno kaj funkcianta dum 1 jaro. Ĉe la elekto de revizoro estas samtempe elektata 1 anstataŭanto.

## **§5. Subskribreguloj**

Aĉeto, vendo aŭ lombardo de domo kaj alpreno de pruntoj povas okazi nur post laŭstatuta decido en la estraro kaj kun la subskribo de la prezidanto kaj de du pliaj estraranoj. Aliokaze la asocio estas devontigata de la prezidanto lige kun alia membro de la estraro.

## **§6. La Ĝenerala Kunveno**

6.1 La Ĝenerala Kunveno estas la plej alta instanco de la societo. Ĝi estas kunvokata de la estraro kun antaŭaverto de minimume 4 semajnoj.

6.2 Proponoj al la Ĝenerala Kunveno devas esti skribe prezentitaj al la estraro minimume 14 tagojn antaŭ la Ĝenerala Kunveno.

6.3 Elektoj kaj decidoj devas okazi per skriba voĉdono, se 1 membro tiel deziras.

6.4 Decidoj estas farataj per simpla voĉ-plimulto, escepte de statutŝanĝoj kaj dissolvo de la asocio (§8 de ĉi tiu statuto).

## **§7. Ordinara kaj eksterordinara Ĝenerala Kunveno**

7.1 La ordinara Ĝenerala Kunveno okazas ĉiujare antaŭ la fino de marto. La tagordo devas enhavi almenaŭ la jenajn punktojn:

1. Elekto de kunvenvidanto
2. Elekto de protokolanto
3. Raporto de la prezidanto
4. Kalkulaĵo
5. Proponoj
6. La estonta laboro
7. Kotizo
8. Elekto de prezidanto
9. Elekto de ceteraj estraranoj
10. Elekto de anstataŭantoj
11. Elekto de revizoroj kaj revizor-anstataŭanto
12. Eventualaĵoj

7.2 La estraro povas ĉiam ajn kunvoki eksterordinaran Ĝeneralan Kunvenon, indikante tagordon.

7.3 La estraro devas kunvoki eksterordinaran Ĝeneralan Kunvenon okazontan plej malfrue 6 semajnojn post kiam minimume 1/3 de la membroj prezentas postulon de tio al la prezidanto, indikante la deziratan tagordon.

## **§8. Ŝanĝo de la statuto kaj dissolvo de la societo**

8.1 Ŝanĝo de ĉi tiu statuto povas okazi sole per decido de la Ĝenerala Kunveno kaj bezonas minimume 2/3 el la donitaj voĉoj.

8.2 La societo povas esti dissolvita nur kiam du sinsekvaj Ĝeneralaj Kunvenoj tion decidas per minimume 2/3 el la donitaj voĉoj. Okaze de dissolvo la posedaĵoj de la societo transiras al Dana Esperanto-Asocio.